

## TESTAMENT DE L'OM SALVARECH 2026

Se delegua via la brosa – la imbaorea i prà indormenzadi  
in doi minuti la sparìs – co i gardelin che fiscia incandadi

Se muof pian en grum de tera – par la siè drìo a tirà el fià  
dopo meis de gran silenzio – anca le solve le torna a rumà

Se destira adasi i ram – sponta i fior su l'armelin  
l'è l'Insuda che buta i oci – al nuof an la fà l'inchin.

Da sot le zope induride – fin soura le neole inte l'ziel  
na os la ziga al mondo – *zerchè valc de nuof, valc de bel!*

Feo come mo a no sentila? – La me sgorla inte inte el pèt  
sta forza la tònna sec – “vecio, deseidete, levete su da chel let!”

E mi na sbadeiada me fae – me cioe su el me bel mantil  
pien de pensieri e regordi – che tut l'an gh'è fat el fil...

Col tut chel NIA che combinè – la mufa la me à colà inte i os  
ogni giro la cres de pì – ma fae come a no ve ride ados?

Prediché orden e soluzoi – ma ve pias dugà a schivanela  
recordeve che è mili oci e recie – tut mete inte scarsela

Cosita co l'è ora che de masnà – i garnei i palpe un a un  
che no se die che l'Om Salvarech – no el ghen à per nisun!

Na roba toca dila – sta farina la sà semper da vecio  
muda i nomi, muda i musì – ma tire fora dal solito secio.

L'è stat momenti che è batù catif – pien de rancor e magon  
da sta outa ve meritè na careza – co la zatada fin do sul galon!

L'è inutile spiegaghe ai mus – te infastidis sol le bestie  
proarè a no perde pì temp – e a fave en puoche de feste

A mi no me vien gnanca pì da piande – è fenì tute le lagreme  
da quant che è sofia el nas – par me sie rebaltà su le giasene!

Mi voi ese alegher – voi sgolà ledier come en pit  
e no come l'an pasà – quante asenade che ve è dit

Ve siè fin scomedonadi – per faghe saè a tuti e anca de pì  
ma nia come el solito – la marevea l'è durada sol trei dì

Avè fat grande sfumerade – zic e ciacole a volontà  
ma no siè stati boni – gnanca en scat de erba de secà!

Dalver pos anca capí – che calchedun se susta  
ma per le parole dite – el cuor no el me se frusta

Insoma mi riporte solche – el pensier dei pì trop  
ese en cin in malagrazia – eh... fà parte dei duoch!

Alè, va ben da sta outa – starè chiet, asarè tirà bonaza  
e a chi de l'Aministrazion – no ghe darè gnanca la caza

I vede... anca ades saveo – ghe se à sbasà le ale a la boca  
i à strendù el cul – co l testament zerti argomenti el toca...

Bademo sol na roba ve saie – taca el terzo an...  
l'è meio dase na mossa – e no fà fegure de scalzacan!

A proposito de laori, stropade – e de grande deslivade  
mancomal che qua da en meis – pasarà a regonà le strade

È sentù fin su la aradio – che sion inte el tappon Dolomitico  
tocarà sgionfà le rode – e ndì su in Duran col me bilico

Taramo che robe de turismo – grum de tifosi su tuti i or  
zitadin che vien col sandalo – a bate le man a chi che cor

Anca là temp trei dì – de noiauter i se avarà desmentegà  
de le nose Terre Alte i se recorda – sol co l'è da ndà a votà!

E a proposito de Duran – elo caì la punta de la Moiazza?  
È vist na gran sverta – voleli slargà e fa na nuova piazza?

Son ndì su inte Gisiuola – vegnendo fora la Val del Marmo  
Po! El Rifugio Tomè no l'era pì – me son mes en cin in alarmo!

Vegnarà fora en gran albergo – da chel che è bù modo de capì  
auter sì che quater brande – e en sac a pelo per ndà a dormì!

Tornon a sé rbasà – do per el centro... nia no se muof  
onde me tochelo ndà a zercà – per catà valc de nuof?

A dive la verità do per la zità – me muove sai de rado  
devente fora mat (che cacao!) – meio stà “allo stato brado”

A vede sti meis pasadi – m'è cresù de chele chile...  
a La Val para de ese – inte na metropoli del Brasile!

Laori de qua, semafori de là – strade piene de bus  
se chesto ol dì ese moderni – meio co se girea col mus!

Per portà sto gas metano – i à trapanà meda La Val  
Ades somea na gincana – ndà fora per qualsiasi cal!

Avanti che son de penta – è na notizia che farà el bot  
na roba che farà ciaro – anca se te la conta de not!

Intant che ndee de sgionda – è sentù valc de strano  
par che fora per zerte cai – no i pose piantà el metano...

Co i à vardà la mappa – gh'è scampà do anca i dent  
da la vila de Lantrach a Cordion – no l'è proprio n'acident!

Somea che al posto de la strada – i ebe tirà en stris bluastro  
Ma solche da sto outa del gas – se ali inascort de chesto “guasto”?

Eh poreto sto Guasto – el ghen combina semper una  
l'è semper el in mez – souratut co i se inventa la luna!

E a proposito de Cordion – e de la strada secondaria  
l'è tut en scanafos – solche mi ebe riscia a ndà per aria?

Ciote via, se un el olese – a pasà do in bicicleta  
dopo meda pedalada – el fenis inte cuneta!

Se te à presa te sta fresco – toca fatela pasà  
parchéche l'è i semafori – che dura n'eternità!

Me sbarlucea fin i oci – con chel lum vert e ros  
e a forza de fitàlo – son fení dret inte en fos!

Sgionfon su stà brentana – a proposito de viabilità  
ancora en per de grosi – i me à fat sacramentà...

I pai de la neif – i aveo dopradi a fà fuoch?  
Me parelo solche a mi – no i e stadi metudì inte tuti i luoch

I avarà pensà che tanto – le nevegade le vien tardive  
ma anca se fa calura... – no vivon no a le Maldive!

Se col versor i caza – na benada en cin storta  
inte en santiamen – i te para la neif davant la porta!

E co la bela staion – de cruzie no ghen è tante  
alora mo a sbregabalon – i à trat fora diserbante

En gran toc in là - le erbe le e tute ndate  
a ghe bategà soura – me son brustolà fin le zate

Fursi l'è solche en trucco – per cavase via el dan  
insieme ai festuc – se seca anca le merde dei can!

Mi son proprio zucon e salvarech – oramai chesto se el sà  
me muove meio de not – cande che nisun pos incontrà

Ma me toca dì dalver – che è bù anca gran timor  
de incrousà la Bereguta – che ghe pias fa terror!

No l'era nianca n'ombria – de en mez lum impizà  
che ogni barc che fee – ere saldo drio a sgamberlà!

Me son proprio pensà – oh Mare Mea Benedeta...  
no l'è che i se avarà perdù via – de pagà la boleta?

Robe da gran tema è sentù – che un no el ghe cret  
a una con viero – i gh'a quasi fat tirà i scarpet!

Ocor cenise boni – e no auzà tant la cresta  
elo el sol de st'istà pasada – che ve ha batù su la testa?

È becà sul Gasetin – en articol che calchidun  
el olea fase do la pel – me pareva de ese a Forùm!

Da spes l'è suziedù – tra vesin de dase fatidio  
ma adiritura qua se parlea – de en tentato omicidio

Nisuna marevea – chi da La Val i e medi maturli  
ma staouta a dí el ver – era i foresti a bate i zurli!

Chi che scrif do le notizie – che i sà l'arte del mestier  
i e en cin come i pescador – i la slonga e i met conzier

Per dontà en cin de pever – se se ghe avese dat a bado  
l'è belche tant se no è rivà – anca chi de "Quarto grado"!

E mi me son studià in presa – a tornà inte i me Talas  
onde che l'è solche alber – e tanta tanta serena pas!

Eh el savè voi – che ndando semper de stornel  
me capitea de vede – anca co en luof el perz el pel...

E puoc dopo de Nadal – me è caì l'ocio su n lampion  
se avarali desmentegà – le sferlinghe tute a sbrindolon?

Co me con arvesinà – è vist nà straza celestina  
con su scrit: 2026 – Olimpiadi Milano-Cortina

Me son fin pisotà ados – tra emozion e marevea  
e de me vede in television – quasi quasi me pareva

Col passaggio dela torcia – tra atleti e dent famosa  
me se scaldea fin el cuor – e se deleghea la borsa

Ma eli pasadi su qua – o se ali desmentegà l'Agordin?  
Elo come el solito – n'auter stato pasà via San Martin?

Toca ese dei fes per no capi – chesta l'era l'ocasion  
per metese in gran mostra – e fa la roda come en paon!

Nia, sta outa la v'è scampada – e sì che l'an pasà l'avè dit  
Fè Unione (Montana!) – senò no vedarè gnanca en schit!

No voi pì stracave – co questioni per na mente fina  
Oleo vede i siador? – Impomateve i calcagn de siolina!

Me par che in tuti i nos paeis – sie vivi i sport invernai  
oleo dime che i pol ciapane – come tant de tananai?

Ma me sbaie del tut – o en valc del genere l'è liet  
sot a una de chele vecie foto – che ogni an i met

Anca a La Val l'era piste da sci – e penseve anca en lach  
Avion belche la vila pronta – per ospità: Cortina-Lantrach!

Ah! Che robe da mat – podion fa en capital su per i Coi  
e inveze come el solito – avon asà ndà tut in moi...

E l'è proprio ver – cande che na outa no se avea nia  
l'era la fam che movea le man – e anca la fantasia!

Ciapemo proprio la Gisia – die proprio l'istituzion  
mi la vede semper pì dalonz – in puoch i pasa el porton

Me ciape proprio gram – e son resta sorpreso  
anca el boletin pastoral – l'è restà in sospeso

Me la moche – ognun el fae come che ghe par  
Elo che, pì del me ese, – en valc de spiritual?

Ades che de grazia – sion pieni de bori e de schei  
per tuta la forania – ghe'n è restà solche trei!

Sta fardima l'è rivà don Giuseppe – a se dontà a chi doi  
ghen ocorarae en auter – tra La Val, Agort, Taibon e el Poi!

Pose fà en gran plauso – co i doven fa tant don Andrea  
inte sti tempi na canonega piena – l'è sol na marevea!

Manco mal che col "Gruppo Giovani" – i boce i sta auna  
i ghe cava fora da i oci sti telefonin – l'è solche na fortuna!

Son insemi e vecio – ma me el recordechel curato de allora  
che l'à bù en bon pensier – parchéche i tosat no i ndese in malora

El s'à pensà che a La Val – en asilo moderno el podea dà na man  
a tirà sù i fioi de chi – i fea fadiga a rencurali e i laorea tut l'an

E fra moneghe e badesse – maestre e colaborator  
l'è zento ani che i boce – i viene tiradi su con amor!

E cande che pareva – che tut ndese de mal  
l'è stat chi che à deciso – de spendeli e comedà La Val!

Che bel che a sto mondo – sie ncora en pouchi de altruisti  
ma proprio dei mè compaesan – pose dì no ie menefreghisti!

Che co l'è ora de muove le man – i è semper in zentomili  
e a tutti i paeis intorno – l'invidia ghe cres a chili

Ghe à ocorù ani – per fa sì che se impolpese el muscol  
ma l'è n'atimo se perde – cognè cenì auna el ciap al pascol

L'è da cenì dur – che col cuor no se sbaia  
la vera forza – se la vet a la fin de la bataia!

E de la nuova carta geologica – ghen aveo sentù parlà?  
Me la son vardada ben polito – anca el Crep de le Verde è catà

Imparéla che semper pì da spes – se se perz per strada  
no l'è che SUEM e soccorso – i pose coreve drio ogni girolada

Ocorarie faghene ancora – de ste grandi mape e tabelle  
purchéché Comun e Pro Loco – i se descusise le scarsele!

E cari voi de la Pro Loco – semper pronti a fa gran festa  
pensee quasi che l'an pasà – ve asiede pers la testa

El tendon inte in cao Conaia – per en meis l'è restà qua  
ve eraieo persi via – ve el avisieo desmentegà?

Se avese po saù – che el servia per fa na noza  
me sarie anca presentà – co en pensier o na boza

En pecà che sie pasà – co la festa l'era compida  
tanto pì che al dì de ancui – no l'è pì nisun che se marida!!

Dai che è quasi fenì el giro – me manca sol doi strofe  
fae sti ultimi barch – e me cave en crodol de la galofe

El nos caro vicinato – alo fursì la data o l'orari sbaià?  
Parchè a l'evento cultural de ancui – no son gnanca riusì a pasà!

L'è lugà fin en antropologo forest – a studià le nose scione  
per capì chi che l'è drio – al Bec Vert o al Basadone...

Se sa che a ese salvarech – l'è anca l'Om da Riva  
ma saralo per el vestì – che a mi quasi i me schiva?

No l'è mia colpa mea – se a me fradel ghe cres el muscio  
el arz meio de mì – ereło chesto fursi el riscio?

Magari chi dal Poi – no i à gnanca fat aposta  
magari i à pensà – che la version techa la fusisiese na crosta...

Mi ghe son restà mal – se podea binà le nose storie e no divide  
ma elo meio chi che la conta – o chi ogni an el la torna a fà vive?

E da ultim con chesta – mi ve la pare là  
doman i ve presenta – i mezzi comunali che i à inprimà...

Me scampa en cin da ride – a pensame a la fegura  
con el pulmin nuof – i à sbaglià la misura!

L'è en cin masa aut – no el ghe pasa inte garas  
che sie meio faghe en box – qua inte inte i Talas?

Ades no stè pensa – che ebe el cuor così dur  
l'è bel e l'è nuof – e per i pupi l'è pì segur.

Me pias vedeli pasà – co i gira a stornelon  
i ghe scauda i sentimenti – anca a sto vecio brontolon!

Specialmente come ancui – cande che tuti insiem i ziga  
Viva! Viva l'Om Salvarech! – e da tuti i cantoi i riva!

Fra calche an ndarè in pension – e per savé en pochi de pet...  
ve cognarà ciamave el MUSLA – a tirà fora quater scarpet

Ma col descòre en cin pi "chic" – e chel dialet quasi moderno...  
ve tocarà dorpà el tradutòr – o ciapà nota sul quaderno!!

Anca staouta come le legne – ve le è metude tute a quert  
son semper stat salvarech – e senziro come en liber vert!

Toca stà atento co le parole – le torna indrio come nà frusta  
e delle mee, i me ha contà – che calchidun en cin se susta...

Per tuti chi che broseghea – e coa sot come bronze vece  
la malizia no la stà inte chel che dighe – ma inte le vose rece!

Cioleve le me canè – bruseme el me bel vestì  
ma asemè scampà via – no sé come pì vel dì!

Ades piché sto fuoch – sta sciona così longa la stufa  
tanto co la me farina – podè ancora faghene dufa!